

Cordialidad Arubiano ta gana premio internacional


Dos empleado di Marriott Aruba a gana premio di "Way to Go"

ORANJESTAD - Como reconocimiento pa nan compromiso y dedicacion den brinda servicio di calidad superior y personal na cada turista cu huesped den nan hotel, Marriott Vacations Worldwide Executive Council a invita Lilian Britten y Mike Rodriguez di Marriott Aruba Ocean Club pa un celebracion special na Orlando - Florida, den cual nan lo reconoce ambos como ganados di un "Way to Go".



E evento aki, conoci como un "Special VIP Event" lo tuma luga entre dia 10 pa 13 di mei 2015 na Merca. Ey e ganadonan di e reconocimiento aki di aña 2014 di tur Marriott Vacation Club di rond mundo lo topa otro.

No ta prome bes cu empleadonan di Aruba ta ricibi e distincion aki. Benedict Pineda a gana e premio aki na aña 2013 y Wilma Benjamin a gana e premio na aña 2014. Nan tambe a biaha e tempo ey pa Orlando, Florida pa ricibi nan distincion.



Pa por gana e premio special aki, e empleado di Marriott mester haya riba 200 comentario di recomendacion di huespednan. No ta diferencia den cua departamento bo ta traha den e hotel, con tal cu e huesped laga un bon comentario y recomendacion pa e

empleado.

Na e compleho di hotelnan Marriott di Aruba, ta haci hopi esfuerso pa por brinda mas y miho servicio na nan huespednan. Den esey ta percura pa empleadonan sigui training nan intensivo a base regular, como parti di nan programa pa garantiza un ser-

vicio di calidad superior. E hecho cu Aruba tin dos representante den e premionan di "Way to Go" ta un bon ehempel di resultado positivo di e inversion haci den train empleadonan den duna bon servicio.

Marriott Resort a habri na Aruba na aña 1995 cu 413 camber. Na aña 1999 a habri Ocean Club cu 311 camber y na aña 2004 a habri Surfclub cu 450 camber. Na tur, e famia di Marriott Aruba ta consisti di mas o menos 1100 empleado den servicio directo y 400 empleado trahando via otro companianan den e compleho di hotelnan. E compleho di Marriott Aruba ta esun di mas grandi den henter Caribe, tanto den cantidad di camber como den cantidad di empleado. □